



Aningaasaqarnermut Akileraartarnermullu Ataatsimiititaliaq
Inatsisartut

13-11-2025
Sags nr. 2025 - 21745
Akt. id. 25967319

Postboks 970
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

**Suliffissanut isertarfik nutaaq pillugu siunersioqatigiinnermut tunngatillugu
Aningaasaqarnermut Akileraartarnermullu Ataatsimiititaliamut akissutit**

Asasakka Aningaasaqarnermut Akileraartarnermullu Ataatsimiititaliaq.

Qujanaq apeqqtunut. Matumuuna akissutit allakkatsigut tunniuppakka.

1. Allakkani 24. Oktoberimeersuni Knowitip Naalakkersuisumit pilersuisutut taaneqarneranut suna tunngaviua, naak Naalakkersuisup 1. Oktober nammineq allagai malillugit isumaqatigiissut atuuttussanngorlugu atsiorneqarsimanngitsoq allassimasoq?

Allakkani ataatsimiititaliap Nalakkersuisumit ulloq 1. Oktober tigusaani ilaatigut allassimavoq isumaqatigiissutip atsiorneqarnissaanut ilassutitut aningaasaliissuteqarnissaq pillugu suliassap nassuiarneqareersup Aningaasaqarnermut Akileraartarnermullu Ataatsimiititaliamut aalajangiiffiqineqarnissaa utaqqineqassasoq.

Akissut:

Taaguut "pilersuisoq" neqeroorteqarnerup 16. januarimiit 3. juni 2025-mut naammassinerata kingorna peqataasumut, suliffissanut isertarfimmik nutaamik ineriartortitsinissamut ingerlatsinissamullu ajugaasutut toqqarneqartumut, tulluurtut taaguutigissallugu atorneqarpoq. Toqqaaneq neqeroortitsineq pillugu Inatsisartut inatsisaat nr. 6, 12. juni 2019-meersoq naapertorluinnarlugu ingerlanneqarpoq. Taamaalluni piffissami tassani pilersuisumik ataatsimik toqqarneqarluni neqeroorteqartitsineq naammassineqarpoq, taamaattumik allaqatigiinnermi pilersuisoq "pilersuisutut" taaneqarluni. Tamanna ajugaasup toqqagaanerani ersersitsivoq – Namminersorlutik Oqartussat tungaanniit inaarutaasumik isumaqatigiissummik atsiortoqanngikkaluartoq.

Naalagaaffiup Eqqartuussissuserisuata naliliigallarnera 9. november 2025-meersumi, naalakkersuisoqarfiup iliuuseqarneri – tassunga ilanngullugit pilersuisumik aallarnisaataasumik ataatsimiinnerit, ingerlaavartumik suleqatigiinnerit ataqatigiissaarinerillu – isumaqatigiissutip imaanik inaarutaasumik akuerineqartut isigineqartariaqartut, naak isumaqatigiissut Namminersorlutik Oqartussanit pisortatigut atsiorneqanngikkaluartoq.



2. Eqqartuussissuserisup allagaatini ulloq 24. oktober tiguneqartuni paasisutissiissutigeriigarpaa isumaqatigiissut Knowitip atsioreerlugu ulloq 12. junimili utertinneqarsimagaa, tamatumualu kingorna Naalakkersuisut akornanni suliamik ingerlatsisumut isumaqatigiissut piffissalersorneqarsimanngitsoq imaluunniit isumaqatigiissutigineqartoq naapertuullugu suliniut aallartinneqartoq. Ilassutitut aningaasaliissutit pillugit Naalakkersuisut qinnuteqaammik ataatsimiititaliamut aatsaat ulloq 11. august tigusaqarmat, Naalakkersuisut ataatsimiititaliamit qinnutigineqartut nassuiaatigalugu suliummut piffissalersuut naaperlugu nalunaarutigineqarpoq isumaqatigiissut erseqinnerusumik isumaqatigiissutigineqarsimasoq Knowit aamma Naalakkersuisut akornanni ulloq 12. junip kingornatigut qanoq iliuuseqarluni isumaqatigiissinnaanersut pillugu?

Akissut:

Naalakkersuisoqarfiup suliniut aningaasaliissutissanik qinnuteqarnek peqatigitillugu aallartippaa, aamma naalakkersuisoqarfiup isummernissamut tunngavissiaq Naalakkersuisunut tamatumalu kingorna Aningaasaqarnermut Akileraartarnermullu Ataatsimiititaliamut nassiunnissaa angumerisinnaasimanngilaa, sulianik nassiussinissamut piffissaliussat nikinganeri pissutigalugit. Suliaq Naalakkersuisut siullermeerlutik augustimi ataatsimiinnissaannut suliarissassanngorlugu nassiunneqarpoq.

Digitalinngortitsinnermut Aqutsisoqarfimmiit inassuteqarnek malillugu neqerooruteqarnek aamma isumaqatigiissummik missingersuummik sunniuteqanngitsumik ilassutitut aningaasaliissutissanik qinnuteqaat peqatigiissillugit suliarineqarput.

Naalagaaffiup Eqqartuussissuserisuata peqatigalugu nalilerpaa, isumaqatigiissummi imaluunniit atortussani ilaatinneqartuni aningaasaliissutitut atorsinnaasumik sunniuteqartumillu nangaassuteqartutut paasineqarsinnaanngitsoq, suliniutip aallartinneqarnissaanut Aningaasaqarnermut Akileraartarnermullu Ataatsimiititaliamit akuersissuseqarnissamut piumasaqaataasinnaasumik. Taamaalluni aningaasaliissutissatut tunngavigisassap amigaataasup Namminersorlutik Oqartussat isumaqatigiissummi akiliuteqarnissamut pisussaaffinnut namminermi pisussaajunnaartinngilai. Naalagaaffiup Eqqartuussissuserisuata naliliinnermini nassuiaatigaa, pilersuisup suliniutip aallartinneqarnera tatigalugu iliuuseqartoq.

3. Suliniummik suliarinninnermut ingerlasup unitsinneqarnissaanik Naalakkersuisoqarfimmit ulloq 9. Oktober qinnuigineqarsimanini sooq Knowitip paasisutissiissutigineraa Naalakkersuisunit akissuteqarfigneqassasoq tassunga atatillugu ataatsimiititaliamit kissaatigineqarpoq.

Akissut:

Aningaasaqarnermut Akileraartarnermullu Ataatsimiititaliap 8. oktober 2025-mi suliffissanut isertarfiup nutaap ineriartortinneqarnissaanut missingersuutitut sunniuteqanngitsumik ilassutitut qinnuteqarnek itigartitsissutigalugu nalunaarutigimmagu, Naalakkersuisoqarfiup nalilerpaa, suliniummik ineriartortitsinnermut sulinerit allat tamaasa unitsinneqarnissaat pisariaqartoq. Taamanikkut sulii paasinarsinngilaq suliaq qanoq nangiinneqassanersoq.

4. Isumaqatigiissutip siuliani taaneqarup atuuttussanngorlugu isumaqatigiissutigineqarsimaninnginnera Naalakkersuisut allakkatigullu ulloq 1. oktober nutaatut paasisutissiissutigaa. Naalakkersuisut paasisutissiissutigaa isumaqatigiissut suliamik taamaallaat isumaginnittumit ulloq 8. september 2025-mi atsiorneqarsimasoq, tigusassamullu naalakkersuisoqarfimmit nassiunneqarsimanngitsoq.



Aningaasaqarnermut Akileraartarnermullu Ataatsimiititaliap suliame aalajangiinera suli tiguneqanngitsaq atorfilittat Knowitumut isumaqatigiisummik sooq atsisimanersut nassuiaateqarfigeqqullugu Naalakkersuisut ataatsimiititaliamit qinnuigineqarput.

Akissut:

Isumaqatigiisummut missingiut isumaqatiginninniarnermut, tassaasoq neqerooruteqarnermi immikkoortoq kingullermut, atatillugu allaffissornikkut piareersarneqarpoq, Digitalinngortitsinermut Aqutsisoqarfimmik ikiuisoqarluni.

Naalagaaffiup Eqqartuussissuserisuata tikkuarpaa, tamatuma kingornatigut aallarnisaataasumik ataatsimiinnerit ingerlaavartumillu suleqatigiinneq ingerlanneqarmata, naalakkersuisoqarfiup tungaaniit iliuuseqarneq tamarmiusoq inaarutaasumik akuersinertut isigineqartariaqarneranut pingaaruteqartoq. Isumaqatigiissutip atorfilittamit atsiorneqarnera allaffissornikkut kukkuneruvoq. Tamanna allaffissornermik ingerlatsisunik kingorna paasineqarpoq. Atorfilittaq paasitinneqarpoq aningaasaliissutitut tunngasut iluamik inissinneqartinnagit, Naalakkersuisoqarfiup isumaqatigiissut atsiorsinnaanngikkaa.

5. Naalakkersuisut suliame matumani inassuteqaataasa akuerineqannginnerat ataatsimiititaliap 8. oktoberimi aalajangiinnermini Naalakkersuisut nalunaarutigereermagu illuatungeriit ilaatigut sulianiutip inaarsarneqarnissaannik oqaloqatigiinnerannik imaqartumik Knovtip Naalakkersuisutsoqarnermut akornanni kingullermik ulloq 8. oktober ataatsimiittoqarsimaneqarnik Knowitip soq paasissutissiissutiginerana Naalakkersuisumit akineqassasoq ataatsimiititaliamit kissaatigineqarpoq. Knowit naapertorlugu suliniutip ingerlanneqarnissaanut aningaasalersuinissaq apeqqutaasoq tamanna tikillugu Knowitumut ilisimatitsissutigineqanngilaq.

Akissut:

Naalakkersuisoqarfiup 29. september imi siunersioqatigiinnerup kingorna Aningaasaqarnermut Akileraartarnermullu Ataatsimiititaliap suliffissanut isertarfiup nutaap missingersuutitut sunniuteqanngitsumik ilassutissatut qinnuteqaammut tunngatillugu isummernissaa pissusissamisoortumik utaqqivaa. 8. oktober 2025-mi ualikkut Naalakkersuisoqarfiup Aningaasaqarnermut Akileraartarnermullu Ataatsimiititaliap missingersuutitut sunniuteqanngitsumik ilassutitut aningaasaliinissap itigartitsissutigisaa tiguvaa. Suliniut pillugu ataatsimiinneq kingulleq 8. oktober 2025-mi pisoq. 9. oktober 2025-mi Knowit nalunaarfigineqarpoq, suliniut unitsissasoq, Aningaasaqarnermut Akileraartarnermullu Ataatsimiititaliap missingersuutitut sunniuteqanngitsumik ilassutitut aningaasaliinissaq itigartitsissutigimmagu. Tamatuma kingorna suliffissanut isertarfiup ineriartortinneqarneranut tunngatillugu sammisanik allanik iliuuseqartoqanngilaq imaluunniit aningaasanik immikkoortitsisoqarnani.

6. Suliffissamut isertarfimmut atatillugu neqerooruteqartitsinermi piumasaqaatit tunngavissallu Aningasaqarnermut Akileraartarnermullu Ataatsimiititaliami siusinnerusukkat ulloq 29. September siunersuinnermi Naalakkersuisup nassuiaatigai.

Neqeroortitsinermi piumasaqaatit eqqortinneqarsimasut Naalakkersuisumit uppersarneqarsinnaava?

Akissut:

Isumaginninnermut, Suliffeqarnermut Nunamullu Namminermut Naalakkersuisoqarfik nammeneq IT-suliniutit pillugit neqerooruteqarnermut tunngasumik eqqortumik suliaqarnerup ingerlannissaanut ilisimasani annertunerusumik paasisimasaqanngilaq. Tamanna tunngavigalugu Naalakkersuisoqarfik



Digitalinngortitsinnermut Aqutsisoqarfimmut attaveqarpoq, taannaammat Namminersorlutik Oqartussat it-aqqissuussamik pisinnermut immikkut suliamut paasisimasaqartoq.

Atorfilitakka qinnuigaakka neqerooruteqarnerup ingerlasarnera nassuiaatigeqqullugu, aamma tassani atuarsinnaavara naalakkersuisoqarfiup neqerooruteqarnermut inatsit eqquutsissimagaa.

7. Suliamut atatillugu Naalakkersuisoqarfimmi inatsisitigut misissuineq ingerlanneqareersimanersoq imaluunniit maanna ingerlanneqarnersoq ilisimatitsissutigineqassasoq ataatsimiititaliamit kissaatigineqarpoq.

Akissut:

Uppernarsarneqarsinnaavoq, Naalakkersuisoqarfiup ataatsimiititaliap aalajangiinera kingulliup kingorna Advokatfirmaet Poul Schmidt, Naalagaaffiup Eqqartuussissuserisuatut ilisimaneqartoq, attaveqarfigaa. Eqqartuussissuserinnermik suliffiup Naalakkersuisoqarfik maannakkut inatsisitigut naliliigallarneq pillugu ikiorpaa, taamaalilluni Knowit-ip eqqartuussissuserisuaaniit piumasaqaammut Namminersorlutik Oqartussat inatsisitigut qanoq inissisimanertik paasiniassammassuk, soorlu ataatsimiititaliaq siusinnerusukkut ilisimatikkinga. Apeqqutitut akissutaagallartumi takuneqarsinnaasutut eqqartuussissuserinnermik suliffiup nalilerpaa, Namminersorlutik Oqartussat Knowit-imiit sulianut ingerlanneqareersunut akiliinissamut piumasaqaateqarneq itigartitsissutigisinnaanngikkaat. Tamanna atuuppoq taamatut piumasaqarnissap naammassineqarnissaanut aningaasaliissutinik pissarsisoqarnersoq apeqqutaatinnagu.

Naalagaaffiup Eqqartuussissuseriata inaarutaasumik allakkiaa suliarineqarpoq. Soorunami allakkiaq kalaallisuunngortillugu nutserneqareerpat ataatsimiititaliamut nassiutissavara.

8. Inatsisit naapertorlugit ulloq 1. januar 2026 suliffissanut nutaamik isertarfeqarnissaa Naalakkersuisunit qanoq qulakkeerneqassava?

Akissut:

Suliffeqarnermi innersuussisarnermut inatsit naapertorlugu Naalakkersuisut suliffissanut isertarfimmik pilersitsisinnaapput. Taamaattumik Naalakkersuisut ilusiliinissaannut marlunnik takorluugaqarput:

1. Jobindex-imik suleqatigiinneq nangillugu Naalakkersuisut suliffissanut isertarfeqassanersut erseqqissinissaata tungaanut
2. Naalakkersuisut aalajangersinnaapput Jobindex-imik suleqateqarneq atorunnaarsinneqassasoq taamaalillunilu kommuninut suliffeqarfinnullu isertarfik pissarsiassaajunnaassaaq

Naalakkersuisutut paasivara suliffissanut isertarfeqarnissap qulakkeerneqarnissaa pisussaaffigalugu, tassami ilinniartunut inatsimmi pisortat sulisitsisullu namminersortut ilinniartut sungiusartullu amerlassusaat Naalakkersuisut suliffissanut isertarfiannut nalunaarsortartussaavaat. Suliffissanut isertarfeqanngippat, sulisitsisut inatsimmik naammassinnissinnaanngillat.

Suliffissanut isertarfik arlalinnik malittarisassaqaqarpoq iliuseqarfiussanik.

Pingaartumik atuupput:

- Ilinniartunut inatsit (Inatsisartut inatsisaat nr. 17, 27. november 2020-meersoq) aamma smiley pillugu nalunaarut nr. 16, 16. marts 2022-meersoq.
- Kalaallit Nunaannut suliffissarsiortut killilersimaarnissaat pillugu Inatsisartut inatsisaat nr. 27, 30. oktober 1992-meersoq.



- Naalakkersuisut ilinniartitsinermut periusissiaat 2024–2030 aamma Attassiinnarnissamut Ineriartortitsinissamullu pilersaarut II.

Taamaallilluni nittartagaq nalinginnaasoq pineqanngilaq, tamannalu isertarfiup ineriartortinneqarnerani aningaasartuutit ersersippaat.

Aningaasaliissuteqartoqassappat aamma neqeroortitsineq nutaarluinnaq aallartinneqarluni tamatumalu kingorna isumaqatigiissut pillugu isumaqatiginninniartoqarluni, immaqa pilersuisoq alla atorlugu aamma programmilorneranik suliaq atorlugu, 1. januar 2026 nallertinnagu angumerineqarsinnaanaviangillat.

Suliffissanut isertarfik 1. januar 2026-mi tamakkiisumik atorsinnaassappat, pissusiviusut malillugit allamik periarfissaqarunangilaq Knowit-imit, ukiup ingerlanerani ajugaalluni neqeroorteqartumit, suliaq aallartinneqartoq naammassisariaqarlugu.

Taamaattumik naatsorsuutigaara Naalakkersuisut isummernissaannut tunngavissiamik piaarnerpaamik saqqummiissallunga. Naalakkersuisut tamanna akuerippassuk, suliaq Aningaasaqarnermut Akileraartarnermullu Ataatsimiititaliamut erngerlugu saqqummiunneqassaaq.

Naggataasumik oqaaseqaatit

Suliffissanut isertarfimmik nutaamik ineriartortitsinermut atatillugu pisoq pillugu annertunerpaamik ajuusaarutigalugu naggataarutaasumik oqaatigerusuppara. Arlaatigulluunniit naammaginangilaq, iliuuseqarnerit pimmeta aningaasaliisarnermut tunngatillugu suleriaatsit atuuttut eqqorluinnarlugit ingerlasoqannginneranut pissutissaqarsinnaasimappat.

Naalakkersuisutut uanga pingaarnertut politikkikkut akisussaaffeqarpunga, naalakkersuisoqarfinga peqqissaarnermut aqutsinermullu pitsaassutsit naammassinagit iliuuseqarsimappat, soorlu Inatsisartut kikkullu tamarmik eqqortumik pisortani oqartussaqaarfimmik naatsorsuutiginnissinnaanerattut. Kukkuneruvoq, aamma taanna kukkuneq uanga nangaassuteqanngivillunga ajuusaarutingaara.

Uannut ersarippoq, suliaq eqqornerusumik naammagittarnerusumillu iliuuseqarfigineqarsinnaagaluartoq – minnerunngitsumik aningaasaliissuteqarnermut tunngatillugu tunngavissap inissinnissaata qulakkeerneqarnissaanut atatillugu, tulliani suliniummik aallartitsinertut paasineqarsinnaasumik alloriartoqannginnerani. Suliffissanut isertarfimmik nutaaliaasumik atorluarsinnaasumillu qulakkeerinissamut politikkikkut anguniagaqarneq, sulisoqarniarnermut suliniuteqarnermik ikorfartuisoq sulisinnaasullu nunatsinneersunik salliutitsisoq, isumaqarsimapput ingerlanerup suleriaatsit qaangiinnarsimagai. Tamanna utoqqatsissutissaanngilaq, kisianni nassuiaaneruvoq kukkunerup qanoq pilersinnaaneranut.

Peqatigalugu erseqqissarniarpara piffissami sutigulluunniit Inatsisartunik imaluunniit Aningaasaqarnermut Akileraartarnermullu Ataatsimiititaliamik tunoqqutseriarnermik pineqanngimmat. Tamanna pisunik kukkulluni naliliineruvoq, qaqugukkut suliniut taamatut ittoq inatsisitigut aallartinneqarsinnaanera pillugu. Kukkuneq tamanna soorunami uanga tamaat akisussaaffingaara.

Taamaattumik Naalakkersuisutut erngerlunga suliniuteqassaanga, isumaqatigiissutit atsiorneqartarnerat pillugu suliffiup iluani tamakkiisumik misissuisoqassasoq, tassunga ilanngullugit sulianik suliarinninnermut ersarissunik najoqutaqarnissat, aningaasaliissutinut tunngatillugu piumasaqaatit suli paasineqartinngit. Tamanna ersarissumik anguniassavara, taamaallilluni pisumik assingusumik uteqqiisoqassanngimmat.



Neriuppunga ataatsimiititaliap paasissagaa matumani suliaq pineqarmat – naak ilungersunaraluarluni – inuiaqatigiinnut suliaasaq nukinginnartumik aaqqiiffigisassaq. Ilumoortumik assorsuaq ajuusaarutigaa suliaq taamatut kinguneqartitsinera, aamma tamaviaarutigissavara naalakkersuisoqarfimmut uangalu sulininnut tatiginninnerup atulerseqqinnissaa anguniarlugu.

Inussiarnersumik Inuulluaqqusillunga

Bentiarq Ottosen